

《大方廣佛華嚴經入不思議解脫境界普賢行願品》 講表

稽首歸依真法界 光明遍照諸如來 普賢文殊海會尊 願得冥資贊玄妙

【壹】解釋經題：

（一）經題：

大——曠兼無際 ———— 遍——明其包含。《涅槃》云：「所言大者，其性廣博，猶如虛空」。
常——約其豎論。《涅槃》云：「所言大者，名之為常」。

然淵府不可以擬其深妙，故寄大以目之，實則言思斯絕。

故下經云：「法性不在於言論 無說離說恒寂滅 諸佛境界不可量 為悟眾生今略說」

方——以正法自持 ———— 正——並無偏偽。
法——皆可軌持。

廣——稱體而周 ———— 能包——猶如虛空包含萬象，遍至一切處。今用稱體之包，則一塵受世界之無邊。
能遍——稱體之遍，則剎那彌法界而無盡。


佛——覺斯玄妙 ———— 能覺——佛陀，梵言此云「覺者」故。
所覺——即上大方廣，斯為玄妙之境故。

華——喻功德萬行 ———— 感果華——喻萬行因，成佛果故。
嚴身華——喻諸位功德，必與位位果俱故。


嚴——飾法成人 ———— 飾其本體——以萬行飾其本體，即嚴上大方廣。如瑩明鏡，鏡雖本淨，非瑩不明。
以行成人——以萬行功德，成佛果之人，若琢玉成器。

經——注無竭之涌泉

得名





開合




觀

心




(二) 品目：

(1)釋所入：



不思議——何故不思議？略有四義：一、事無邊故，二、理深遠故，三、此二無礙故，四、以性融相，重重無盡故。

(2)釋能入：



註：

一、所求普——謂要求證一切如來平等所證故	六、無礙行普——上二交徹故
二、所化普——一毛端處，有多眾生皆化盡故	七、融通行普——隨一一行融攝無盡故
三、所斷普——無有一惑而不斷故	八、所起用普——用無不能無不周故
四、所行事行普——無有一行而不行故	九、所行處普——上之八門，遍帝網剎而修行故
五、所行理行普——即上事行，皆徹理源，性具足故	十、所行時普——窮三際時，念劫圓融，無竟期故

◎上之十行，參而不雜，涉入重重故。

(3)釋入義：

能所契合，泯絕無寄，方為真入。

◎為《華嚴》關鍵，修行樞機，文約義豐，功高益廣，能簡能易，唯遠唯深，可讚可傳，可行可寶。

——糅合 唐 清涼國師著《大方廣佛華嚴經疏》并《大方廣佛華嚴經普賢行願品別行疏》——

【貳】本經宗旨：

《華嚴行願品疏》：「今此即以入法界緣起，普賢行願為宗」。

【參】翻譯傳授：

恒本——《不思議品》云：「一切法界虛空界等世界，悉以一毛周遍度量。一一毛端處，於念念中不可說微塵等身，盡未來際劫常轉法輪」。

此非可結集，不可限其品頌多少，亦非下位所能受持。

大本——如下海雲比丘所受持《普眼經》，以須彌山聚筆，四大海水墨，書一品修多羅不可窮盡，如是等品復過塵數。此是諸大菩薩陀羅尼力之所受持，亦非貝葉所能書記。

上本——此是結集文中之上本也，故西域相傳：龍樹菩薩往龍宮，見《大不思議解脫經》有三本：上本有十三大千世界微塵數頌，四天下微塵數品。

中本——有四十九萬八千八百偈、一千二百品。此上二本並祕在龍宮，非閻浮提人力所受持，故此不傳。

下本——有十萬頌、三十八品，龍樹將此本出現傳天竺，即攝論百千為十萬也。

《西域記》說：在于闐國南遮俱槃國山中，具有此本。

略本——即此土所傳六十卷本，是彼十萬頌中，前分三萬六千頌要略所出也。

——恭錄自 法藏大師《華嚴經探玄記》（卷1）——

部類	別名	譯者	翻譯年代	翻譯處所	內容
華嚴經	六十華嚴(晉譯)	東晉·于闐 佛陀跋陀羅	義熙十四年(AC 418)始 元熙二年(AC 420)畢	揚州·道 場寺	六十卷、三十四 品、49萬餘字
	八十華嚴(唐譯)	唐·于闐國 實叉難陀	天后證聖元年(AC 695)始 天后聖曆二年(AC 699)畢	東都大 內·大遍 空寺·佛 授記寺	八十卷、三十九 品、53萬8000 餘字
行願品	四十華嚴(唐譯) (入不思議解脫 境界普賢行願 品)	唐·罽賓國 般若三藏	貞元十二年(AC 796)始 貞元十四年(AC 798)畢	長安·崇 福寺	四十卷、一品 25萬餘字
	普賢菩薩行願讚	唐·北天竺 不空三藏			一卷
	文殊師利發願經	東晉·天竺佛 陀跋陀羅			一卷

○關於《六十華嚴》與《八十華嚴》的內容差別，可參閱《大藏會閱》第二冊·p.346「華嚴經晉唐二譯品會對照表」

【肆】隨文解釋：

甲初、序分_二

乙一、結前廣偈

爾時，普賢菩薩摩訶薩，稱歎如來勝功德已。

乙二、結說不盡

告諸菩薩及善財言：善男子！如來功德，假使十方一切諸佛，經不可說不可說佛剎極微塵數劫，相續演說，不可窮盡。

甲二、正宗分_二

乙初、正陳所說_二

丙初、長行_二

丁初、正示普因_四

戊初、標示所應

若欲成就此功德門，應修十種廣大行願。

戊二、徵列名數

何等為十？一者禮敬諸佛、二者稱讚如來、三者廣修供養、四者懺悔業障、五者隨喜功德、六者請轉法輪、七者請佛住世、八者常隨佛學、九者恆順眾生、十者普皆迴向。

戊三、牒名列釋_二

己初、總徵

善財白言：大聖！云何禮敬，乃至迴向？

己二、別釋₊

庚初、釋禮敬諸佛_二

辛初、牒名

普賢菩薩告善財言：善男子！言禮敬諸佛者。

辛二、釋相_二

壬一、所禮境

所有盡法界虛空界，十方三世一切佛剎極微塵數諸佛世尊。

壬二、能禮因

我以普賢行願力故，深心信解，如對目前。

壬三、能禮相_二

癸初、總明

悉以清淨身語意業，常修禮敬。

癸二、別顯

一一佛所，皆現不可說不可說佛剎極微塵數身，一一身遍禮不可說不可說佛剎極微塵數佛。

辛三、總結_二

壬初、顯無盡_二

癸初、別明虛空_二

子初、反顯

虛空界盡，我禮乃盡。

子二、順釋

以虛空界不可盡故，我此禮敬無有窮盡。

癸二、總例餘三

如是乃至眾生界盡、眾生業盡、眾生煩惱盡，我禮乃盡。而眾生界乃至煩惱無有盡故，我此禮敬無有窮盡。

壬二、彰無間

念念相續無有間斷，身語意業無有疲厭。

庚二、釋稱讚如來_三

辛初、牒名

復次善男子，言稱讚如來者。

辛二、釋相_三

壬一、所讚境

所有盡法界虛空界，十方三世一切剎土，所有極微一一塵中，皆有一切世界極微塵數佛，一一佛所，皆有菩薩海會圍繞。

壬二、能讚因

我當悉以甚深勝解現前知見。

壬三、能讚相_四

癸一、標能讚相

各以出過辯才天女微妙舌根。

癸二、正辨稱讚

一一舌根出無盡音聲海，一一音聲出一切言辭海，稱揚讚歎一切如來諸功德海。

癸三、讚所經時

窮未來際，相續不斷。

癸四、明其周遍

盡於法界，無不周遍。

辛三、總結_二

壬初、顯無盡_二

癸初、反顯

如是虛空界盡、眾生界盡、眾生業盡、眾生煩惱盡，我讚乃盡。

癸二、順成

而虛空界乃至煩惱無有盡故，我此讚歎無有窮盡。

壬二、彰無間

念念相續無有間斷，身語意業無有疲厭。

庚三、釋廣修供養_三

辛初、牒名

復次善男子，言廣修供養者。

辛二、釋相_二

壬初、正明供行_四

癸一、所供境

所有盡法界虛空界，十方三世一切佛剎極微塵中，一一各有一切世界極微塵數佛。一一佛所，種種菩薩海會圍繞。

癸二、能供因

我以普賢行願力故，起深信解現前知見。

癸三、列供具

悉以上妙諸供養具而為供養，所謂華雲、鬘雲、天音樂雲、天傘蓋雲、天衣服

雲、天種種香、塗香、燒香、末香，如是等雲，一一量如須彌山王。然種種燈、酥燈、油燈、諸香油燈，一一燈炷如須彌山，一一燈油如大海水。

癸四、正供養

以如是等諸供養具，常為供養。

壬二、校量顯勝_二

癸初、校量_二

子初、舉所校量_二

丑一、總指

善男子，諸供養中，法供養最。

丑二、別明

所謂如說修行供養、利益眾生供養、攝受眾生供養、代眾生苦供養、勤修善根供養、不捨菩薩業供養、不離菩提心供養。

子二、正明校量

善男子！如前供養無量功德，比法供養一念功德，百分不及一、千分不及一、百千俱胝那由他分、迦羅分、算分、數分、喻分、優波尼沙陀分，亦不及一。

癸二、徵釋

何以故？以諸如來尊重法故，以如說行出生諸佛故。若諸菩薩行法供養，則得成就供養如來，如是修行是真供養故。

辛三、總結

此廣大最勝供養，虛空界盡、眾生界盡、眾生業盡、眾生煩惱盡，我供乃盡。而虛空界乃至煩惱不可盡故，我此供養亦無有盡。念念相續無有間斷，身語意業無有疲厭。

庚四、釋懺悔業障_二

辛初、牒名

復次善男子，言懺除業障者。

辛二、釋相_二

壬初、舉所懺_二

癸一、正舉

菩薩自念我於過去無始劫中，由貪瞋癡，發身口意，作諸惡業。

癸二、顯多

無量無邊，若此惡業有體相者，盡虛空界不能容受。

壬二、辨懺相^二

癸一、明懺業具

我今悉以清淨三業。

癸二、明所對境

遍於法界極微塵剎，一切諸佛菩薩眾前，誠心懺悔，後不復造，恆住淨戒一切功德。

辛三、總結

如是虛空界盡、眾生界盡、眾生業盡、眾生煩惱盡，我懺乃盡。而虛空界乃至眾生煩惱不可盡故，我此懺悔無有窮盡。念念相續無有間斷，身語意業無有疲厭。

庚五、釋隨喜功德^三

辛初、牒名

復次善男子，言隨喜功德者。

辛二、釋相^四

壬一、喜如來善

所有盡法界虛空界，十方三世一切佛剎極微塵數諸佛如來，從初發心，為一切智，勤修福聚，不惜身命，經不可說不可說佛剎極微塵數劫。一一劫中，捨不可說不可說佛剎極微塵數頭目手足。如是一切難行苦行，圓滿種種波羅密門，證入種種菩薩智地，成就諸佛無上菩提，及般涅槃，分布舍利所有善根，我皆隨喜。

壬二、喜諸趣善

及彼十方一切世界，六趣四生，一切種類所有功德，乃至一塵，我皆隨喜。

壬三、喜二乘善

十方三世一切聲聞、及辟支佛，有學無學所有功德，我皆隨喜。

壬四、喜菩薩善

一切菩薩所修無量難行苦行，志求無上正等菩提，廣大功德，我皆隨喜。

辛三、總結

如是虛空界盡、眾生界盡、眾生業盡、眾生煩惱盡，我此隨喜無有窮盡。念念相續無有間斷，身語意業，無有疲厭。

庚六、釋請轉法輪_三

辛一、牒名

復次善男子，言請轉法輪者。

辛二、釋相_二

壬一、舉所請境

所有盡法界虛空界，十方三世一切佛剎極微塵中。一一各有不可說不可說，佛剎極微塵數廣大佛剎，一一剎中，念念有不可說不可說，佛剎極微塵數一切諸佛成等正覺，一切菩薩海會圍繞。

壬二、正明請法

而我悉以身語意業種種方便，殷勤勸請，轉妙法輪。

辛三、總結

如是虛空界盡、眾生界盡、眾生業盡、眾生煩惱盡，我常勸請一切諸佛轉正法輪，無有窮盡。念念相續無有間斷，身語意業無有疲厭。

庚七、釋請佛住世_三

辛初、牒名

復次善男子，言請佛住世者。

辛二、釋相

所有盡法界虛空界，十方三世一切佛剎極微塵數諸佛如來，將欲示現般涅槃者，及諸菩薩、聲聞、緣覺有學無學，乃至一切諸善知識，我悉勸請莫入涅槃，經於一切佛剎極微塵數劫，為欲利樂一切眾生。

辛三、總結

如是虛空界盡、眾生界盡、眾生業盡、眾生煩惱盡，我此勸請無有窮盡。念念相續無有間斷，身語意業，無有疲厭。

庚八、釋常隨佛學_三

辛初、牒名

復次善男子，言常隨佛學者。

辛二、釋相_三

壬初、學本師_三

癸初、明所學_三

子一、明因行

如此娑婆世界，毗盧遮那如來，從初發心，精進不退。以不可說不可說身命而為布施，剝皮為紙，析骨為筆，刺血為墨，書寫經典，積如須彌，為重法故不惜身命。何況王位、城邑聚落、宮殿園林，一切所有，及餘種種難行苦行。

子二、辨果用

乃至樹下成大菩提，示種種神通，起種種變化，現種種佛身，處種種眾會。或處一切諸大菩薩眾會道場、或處聲聞及辟支佛眾會道場、或處轉輪聖王、小王眷屬眾會道場、或處剎利及婆羅門、長者居士眾會道場。乃至或處天、龍八部、人非人等眾會道場。處於如是種種眾會，以圓滿音，如大雷震，隨其樂欲，成熟眾生，乃至示現入於涅槃。

癸二、辨能學

如是一切，我皆隨學。

壬二、例一切

如今世尊毗盧遮那，如是盡法界虛空界，十方三世一切佛剎所有塵中，一切如來皆亦如是。於念念中，我皆隨學。

辛三、總結

如是虛空界盡、眾生界盡、眾生業盡、眾生煩惱盡，我此隨學無有窮盡。念念相續無有間斷，身語意業，無有疲厭。

庚九、釋恒順眾生_三

辛初、牒名

復次善男子，言恒順眾生者。

辛二、釋相_三

壬初、正明_三

癸一、所順眾生

謂盡法界虛空界，十方剎海，所有眾生，種種差別。所謂卵生、胎生、溼生、化生。或有依於地、水、火、風、而生住者，或有依空、及諸卉木而生住者。種種生類、種種色身、種種形狀、種種相貌、種種壽量、種种族類、種種名號、種種心性、種種知見、種種欲樂、種種意行、種種威儀。種種衣服、種種飲食。處於種種村營、聚落、城邑、宮殿。乃至一切天、龍八部、人非人等，無足、二足、四足、多足，有色、無色、有想、無想、非有想非無想。

癸二、正明隨順

如是等類，我皆於彼隨順而轉。種種承事，種種供養。如敬父母，如奉師長，及阿羅漢、乃至如來，等無有異。於諸病苦，為作良醫。於失道者，示其正路。於闇夜中，為作光明。於貧窮者，令得伏藏。菩薩如是平等饒益一切眾生。

壬二、徵釋_二

癸初、令佛喜

何以故？菩薩若能隨順眾生，則為隨順供養諸佛。若於眾生尊重承事，則為尊重承事如來。若令眾生生歡喜者，則令一切如來歡喜。

癸二、增大悲_二

子一、徵

何以故？

子二、釋_二

丑初、法

諸佛如來以大悲心而為體故，因於眾生而起大悲，因於大悲，生菩提心，因菩提心，成等正覺。

丑二、喻

譬如曠野沙磧之中，有大樹王，若根得水，枝葉華果悉皆繁茂。

丑三、合_四

寅初、正合法

生死曠野、菩提樹王亦復如是，一切眾生而為樹根，諸佛菩薩而為華果。以大悲水饒益眾生，則能成就諸佛菩薩智慧華果。

寅二、重徵釋

何以故？若諸菩薩以大悲水饒益眾生，則能成就阿耨多羅三藐三菩提故。

寅三、反結成

是故菩提屬於眾生，若無眾生，一切菩薩終不能成無上正覺。

寅四、結示令知

善男子！汝於此義，應如是解。以於眾生心平等故，則能成就圓滿大悲。以大悲心隨眾生故，則能成就供養如來。

辛三、總結

菩薩如是隨順眾生，虛空界盡、眾生界盡、眾生業盡、眾生煩惱盡，我此隨順無有窮盡。念念相續無有間斷，身語意業無有疲厭。

庚十、釋普皆迴向_三

辛初、牒名

復次善男子，言普皆迴向者。

辛二、釋相_二

壬初、明所迴善根

從初禮拜、乃至隨順所有功德。

壬二、正明迴向_二

癸一、願離苦成善

皆悉迴向盡法界、虛空界一切眾生。願令眾生，常得安樂，無諸病苦。欲行惡法，皆悉不成。所修善業，皆速成就。關閉一切諸惡趣門，開示人天涅槃正路。

癸二、發心代苦

若諸眾生，因其積集諸惡業故，所感一切極重苦果，我皆代受。令彼眾生悉得解脫，究竟成就無上菩提。

辛三、總結

菩薩如是所修迴向，虛空界盡、眾生界盡、眾生業盡、眾生煩惱盡，我此迴向無有窮盡。念念相續無有間斷，身語意業無有疲厭。

戊四、結益令知

善男子，是為菩薩摩訶薩十種大願，具足圓滿。若諸菩薩於此大願，隨順趣入，則能成熟一切眾生，則能隨順阿耨多羅三藐三菩提，則能成滿普賢菩薩諸行願海。

是故善男子，汝於此義，應如是知。

丁二、顯經勝德_二

戊初、校量聞經德

若有善男子善女人，以滿十方無量無邊不可說不可說，佛剎極微塵數一切世界上妙七寶，及諸人天最勝安樂，布施爾所一切世界所有眾生，供養爾所一切世界諸佛菩薩，經爾所佛剎極微塵數劫，相續不斷，所得功德。若復有人聞此願王，一經於耳，所有功德，比前功德，百分不及一、千分不及一、乃至優波尼沙陀分亦不及一。

戊二、顯餘眾行德_二

己初、總明法行略說功德

或復有人以深信心，於此大願受持、讀誦、乃至書寫一四句偈，速能除滅五無間業，所有世間身心等病，種種苦惱，乃至佛剎極微塵數一切惡業，皆得消除。一切魔軍、夜叉、羅剎、若鳩槃荼、若毗舍闍、若部多等飲血啗肉諸惡鬼神，皆悉遠離，或時發心親近守護。

己二、偏舉一行廣顯眾德_二

庚初、舉一行

是故若人誦此願者。

庚二、廣顯眾德_三

辛初、通明五果_五

壬一、增上果

行於世間，無有障礙，如空中月出於雲翳。諸佛菩薩之所稱讚，一切人天皆應禮敬，一切眾生悉應供養。

壬二、等流果

此善男子，善得人身，圓滿普賢所有功德。不久當如普賢菩薩，速得成就微妙色身，具三十二大丈夫相。

壬三、異熟果

若生人天所在之處，常居勝族。

壬四、士用果

悉能破壞一切惡趣，悉能遠離一切惡友，悉能制伏一切外道。

壬五、離繫果

悉能解脫一切煩惱，如師子王摧伏群獸，堪受一切眾生供養。

辛二、別明淨土果_二

壬初、顯法功德

又復是人臨命終時，最後剎那，一切諸根悉皆散壞，一切親屬悉皆捨離，一切威勢悉皆退失。輔相大臣、宮城內外、象馬車乘、珍寶伏藏，如是一切無復相隨。唯此願王不相捨離，於一切時引導其前，一剎那中，即得往生極樂世界。

壬二、別明勝果_二

癸初、亦異熟果

到已，即見阿彌陀佛、文殊師利菩薩、普賢菩薩、觀自在菩薩、彌勒菩薩等，此諸菩薩色相端嚴，功德具足，所共圍繞。其人自見生蓮華中，蒙佛授記。

癸二、亦士用果

得授記已，經於無數百千萬億那由他劫，普於十方不可說不可說世界，以智慧力，隨眾生心而為利益。

辛三、究竟成佛果

不久當坐菩提道場，降伏魔軍，成等正覺。轉妙法輪，能令佛剎極微塵數世界眾生，發菩提心，隨其根性，教化成熟。乃至盡於未來劫海，廣能利益一切眾生。

丁三、結勸受持_三

戊一、結前勝德

善男子！彼諸眾生若聞、若信此大願王，受持讀誦，廣為人說。所有功德，除佛世尊，餘無知者。

戊二、正明勸持

是故汝等，聞此願王，莫生疑念，應當諦受。受已能讀，讀已能誦，誦已能持，乃至書寫，廣為人說。

戊三、重舉勝德

是諸人等，於一念中，所有行願，皆得成就。所獲福聚，無量無邊。能於煩惱

大苦海中，拔濟眾生，令其出離，皆得往生阿彌陀佛極樂世界。

丙二、偈頌_二

丁初、標舉

爾時普賢菩薩摩訶薩，欲重宣此義，普觀十方，而說偈言：

丁二、正頌_三

戊初、頌正示普因_二

己初、別頌前十門_八

庚一、頌禮敬諸佛

所有十方世界中 三世一切人師子 我以清淨身語意 一切遍禮盡無餘
普賢行願威神力 普現一切如來前 一身復現剎塵身 一一遍禮剎塵佛

庚二、頌稱讚如來

於一塵中塵數佛 各處菩薩眾會中 無盡法界塵亦然 深信諸佛皆充滿
各以一切音聲海 普出無盡妙言辭 盡於未來一切劫 讚佛甚深功德海

庚三、頌廣修供養

以諸最勝妙華鬘 伎樂塗香及傘蓋 如是最勝莊嚴具 我以供養諸如來
最勝衣服最勝香 末香燒香與燈燭 一一皆如妙高聚 我悉供養諸如來
我以廣大勝解心 深信一切三世佛 悉以普賢行願力 普遍供養諸如來

庚四、頌懺除業障

我昔所造諸惡業 皆由無始貪瞋癡 從身語意之所生 一切我今皆懺悔

庚五、頌隨喜功德

十方一切諸眾生 二乘有學及無學 一切如來與菩薩 所有功德皆隨喜

庚六、頌請轉法輪

十方所有世間燈 最初成就菩提者 我今一切皆勸請 轉於無上妙法輪

庚七、頌請佛住世

諸佛若欲示涅槃 我悉至誠而勸請 唯願久住剎塵劫 利樂一切諸眾生

庚八、合頌後三_二
辛初、合頌三門_三
壬一、總標迴向

所有禮讚供養福 請佛住世轉法輪 隨喜懺悔諸善根 迴向眾生及佛道

壬二、別顯三門_三
癸初、頌常隨佛學

我隨一切如來學 修習普賢圓滿行 供養過去諸如來 及與現在十方佛
未來一切天人師 一切意樂皆圓滿 我願普隨三世學 速得成就大菩提

癸二、頌恒順眾生

所有十方一切剎 廣大清淨妙莊嚴 眾會圍繞諸如來 悉在菩提樹王下
十方所有諸眾生 願離憂患常安樂 獲得甚深正法利 滅除煩惱盡無餘

癸三、廣頌前迴向_二
子初、別發十大願₊
丑一、受持願

我為菩提修行時 一切趣中成宿命 常得出家修淨戒 無垢無破無穿漏
天龍夜叉鳩槃荼 乃至人與非人等 所有一切眾生語 悉以諸音而說法

丑二、修行二利願

勤修清淨波羅蜜 恒不忘失菩提心 滅除障垢無有餘 一切妙行皆成就
於諸惑業及魔境 世間道中得解脫 猶如蓮華不著水 亦如日月不住空

丑三、成熟眾生願

悉除一切惡道苦 等與一切群生樂 如是經於剎塵劫 十方利益恒無盡
我常隨順諸眾生 盡於未來一切劫 恒修普賢廣大行 圓滿無上大菩提

丑四、不離願

所有與我同行者 於一切處同集會 身口意業皆同等 一切行願同修學
所有益我善知識 為我顯示普賢行 常願與我同集會 於我常生歡喜心

丑五、供養願

願常面見諸如來 及諸佛子眾圍繞 於彼皆興廣大供 盡未來劫無疲厭
願持諸佛微妙法 光顯一切菩提行 究竟清淨普賢道 盡未來劫常修習

丑六、利益願

我於一切諸有中 所修福智恒無盡 定慧方便及解脫 獲諸無盡功德藏
一塵中有塵數剎 一一剎有難思佛 一一佛處眾會中 我見恒演菩提行

丑七、轉法輪願

普盡十方諸剎海 一一毛端三世海 佛海及與國土海 我遍修行經劫海
一切如來語清淨 一言具眾音聲海 隨諸眾生意樂音 一流佛辯才海
三世一切諸如來 於彼無盡語言海 恒轉理趣妙法輪 我深智力普能入

丑八、淨土願

我能深入於未來 盡一切劫為一念 三世所有一切劫 為一念際我皆入
我於一念見三世 所有一切人師子 亦常入佛境界中 如幻解脫及威力

丑九、承事願

於一毛端極微中 出現三世莊嚴剎 十方塵剎諸毛端 我皆深入而嚴淨
所有未來照世燈 成道轉法悟群有 究竟佛事示涅槃 我皆往詣而親近

丑十、成正覺願

速疾周遍神通力 普門遍入大乘力 智行普修功德力 威神普覆大慈力
遍淨莊嚴勝福力 無著無依智慧力 定慧方便威神力 普能積集菩提力
清淨一切善業力 摧滅一切煩惱力 降伏一切諸魔力 圓滿普賢諸行力

子二、總結大願

丑初、總結十願

普能嚴淨諸剎海 解脫一切眾生海 善能分別諸法海 能甚深入智慧海
普能清淨諸行海 圓滿一切諸願海 親近供養諸佛海 修行無倦經劫海
三世一切諸如來 最勝菩提諸行願 我皆供養圓滿修 以普賢行悟菩提

丑二、結歸二聖_二

寅一、偏同普賢

一切如來有長子 彼名號曰普賢尊 我今迴向諸善根 願諸智行悉同彼
願身口意恒清淨 諸行剎土亦復然 如是智慧號普賢 願我與彼皆同等

寅二、雙同二聖

我為遍淨普賢行 文殊師利諸大願 滿彼事業盡無餘 未來際劫恒無倦
我所修行無有量 獲得無量諸功德 安住無量諸行中 了達一切神通力
文殊師利勇猛智 普賢慧行亦復然 我今迴向諸善根 隨彼一切常修學

壬三、結歸迴向

三世諸佛所稱讚 如是最勝諸大願 我今迴向諸善根 為得普賢殊勝行

辛二、頌願生淨土

願我臨欲命終時 盡除一切諸障礙 面見彼佛阿彌陀 即得往生安樂剎
我既往生彼國已 現前成就此大願 一切圓滿盡無餘 利樂一切眾生界
彼佛眾會咸清淨 我時於勝蓮花生 親睹如來無量光 現前授我菩提記
蒙彼如來授記已 化身無數百俱胝 智力廣大遍十方 普利一切眾生界

己二、頌總結十門無盡

乃至虛空世界盡 眾生及業煩惱盡 如是一切無盡時 我願究竟恒無盡

戊二、頌顯經勝德_二

己一、頌校量聞經益_二

庚一、能校

十方所有無邊剎 莊嚴眾寶供如來 最勝安樂施天人 經一切剎微塵劫

庚二、所校

若人於此勝願王 一經於耳能生信 求勝菩提心渴仰 獲勝功德過於彼

己二、通頌顯眾行益_二

庚初、通頌五果_五

辛一、增上果

即常遠離惡知識 永離一切諸惡道 速見如來無量光 具此普賢最勝願

辛二、等流果

此人善得勝壽命 此人善來人中生 此人不久當成就 如彼普賢菩薩行

辛三、離繫果

往昔由無智慧力 所造極惡五無間 誦此普賢大願王 一念速疾皆消滅

辛四、異熟果

族姓種類及容色 相好智慧咸圓滿

辛五、士用果

諸魔外道不能摧 堪為三界所應供

庚二、頌究竟果

速詣菩提大樹王 坐已降伏諸魔眾 成等正覺轉法輪 普利一切諸含識

戊三、頌結勸受持_三

己一、結前諸行

若人於此普賢願 讀誦受持及演說 果報唯佛能證知 決定獲勝菩提道

己二、重顯勝益

若人誦此普賢願 我說少分之善根 一念一切悉皆圓 成就眾生清淨願

己三、結成迴向

我此普賢殊勝行 無邊勝福皆迴向 普願沉溺諸眾生 速往無量光佛剎

乙二、結說讚善

爾時，普賢菩薩摩訶薩於如來前，說此普賢廣大願王清淨偈已，善財童子踊躍無量，一切菩薩皆大歡喜。如來讚言：善哉！善哉！

甲三、流通分_三

乙一、指所說法

爾時，世尊與諸聖者菩薩摩訶薩，演說如是不可思議解脫境界勝法門時。

乙二、時眾受持_三

丙初、列能持眾_三

丁一、菩薩眾_四

戊初、第一類

文殊師利菩薩而為上首，諸大菩薩、及所成熟六千比丘。

戊二、第二類

彌勒菩薩而為上首，賢劫一切諸大菩薩。

戊三、第三類

無垢普賢菩薩而為上首，一生補處、住灌頂位諸大菩薩。

戊四、第四類

及餘十方種種世界普來集會，一切剎海極微塵數諸菩薩摩訶薩眾。

丁二、聲聞眾

大智舍利弗、摩訶目犍連等而為上首諸大聲聞。

丁三、雜類眾

并諸人天、一切世主、天、龍、夜叉、乾闥婆、阿修羅、迦樓羅、緊那羅、摩睺羅伽、人非人等一切大眾。

丙二、總結受持

聞佛所說，皆大歡喜，信受奉行。

——《大方廣佛華嚴經入不思議解脫境界普賢行願品》 講表 竟 ——

十大願王 導歸極樂 末後牢關 和盤直拓 擬議躊躇 千錯萬錯 說性譚心 無繩自縛
親睹如來無量光 方知此語非嬉謔 寄語參玄學語流 休將向上閒穿鑿

——《靈峰蕩益大師宗論》——